

四庫全書

集部

欽定四庫全書

集部

江月松風集卷一至六

詳校官監察御史<sub>臣</sub>劉涓

中書<sub>臣</sub>劉源溥覆勘

覆校官中書<sub>臣</sub>張虎拜

校對官中書<sub>臣</sub>溫汝适

謄錄監生<sub>臣</sub>李逢堯

欽定四庫全書

集部五

江月松風集

別集類四  
元

提要

臣等謹案江月松風集十二卷元錢惟善撰  
惟善字思復自號心白道人錢塘人領至正  
辛巳鄉薦官至副提舉張士誠據吳退隱吳  
江又移居華亭明洪武初卒惟善博學強記  
初應鄉試時題曰羅刹江賦鎖院三千人不

知出處獨惟善引枚乘七發證錢唐之曲江

即羅剎江

按枚乘稱廣陵之曲江則觀潮當在揚州後人謂漢時廣陵地廣遂

以錢唐之潮當之殊為附會惟善此賦蓋亦沿舊說之悞不足為據謹附訂於此大

為主司所稱由是知名其集在明不甚顯故

焦竑換國史經籍志收元人詩集頗夥而惟

善所作不著錄其傳於世者惟賴良大雅集

所錄詩九首而已此本初為惟善手書真蹟

藏於練川陸氏後歸嘉興曹溶康熙中金侃

於溶家抄得又以甫里許氏所藏本互相參  
證始繕為此編流傳於世顧嗣立元詩選所  
錄即據此編採入者也乾隆四十二年五月  
恭校上

總纂官臣紀昀臣陸錫熊臣孫士毅

總校官臣陸費墀



欽定四庫全書

江月松風集卷一

元 錢惟善 撰

古詩二首

鳳麟別千載騷雅流餘聲南入蒼梧天鴻雁雖雖鳴騁  
目江上秋秋雲白英英扣舷欲何之山水遺韶韻  
白馬幾朝夕震盪赤帝闕不洗鴟夷魂千年屬鏤血我  
欲騎赤蚪東上探禹穴手披青玉書逍遙弄明月

送韓介石之平江財賦提舉分韻得館娃宮

吳宮沒花草千年游鹿麋  
薌徑空陳迹琴臺餘故基  
雲木蔓秀峰秋蕤生廢池  
湖波澹空碧扁舟想鳴夷  
伊人已云遠逸駕誰能追  
可憐當時樂徒令後來悲  
今君賦遠游登覽却蛾眉  
青楓莫天濶曠望瓊裾辭

次韻

負郭豈無資躬耕樂田野  
交桑扈鳴好雨光風灑扣  
角長夜歌荷蓑卧牛下  
曉行隴畝間新水沒秧馬  
我聞



行路難自古多輒軻

五柳風脩脩牀頭酒初熟萬事不挂懷  
敝屣視金屋長嘯歌遠遊瞻彼嶽之麓  
餐霞飲沆瀣逝將老雲谷

懷李坦之

懷哉謫仙人白駒在雲谷玄風不可攀  
高枝弄黃鵠馮湖望西山爽氣照書屋  
間賦招隱篇悠然遠榮辱勸我以浮白  
贈我以結綠落日錢塘江吞聲空注目  
閉門客不來長歌飯黃犢

對月酌酒

對月不飲酒何以陶吾生  
明輝散空白照我千載情  
冷然輒忘寐但覺風露清  
寒蛩襟羣籟天地皆秋聲  
流光不可駐長江終夜鳴  
酒盡月欲墮浩歌倚層城

陪吳叔勝諸君吳山小飲  
客有期不至者作詩貽之  
分得人字限十韻

晴嵐鬱孤翠幽亭萃嘉賓  
維時風日美適目江山新  
鳴絃調初夏擷芳惜餘春  
息景在茂樹俯淵窺潛鱗  
雍雍

文字飲楚楚尊俎陳德馨幽蘭佩石澗蒼苔裊清賞暫  
消搖素期非隱淪黃鳥鳴吾傍嚶嚶若懷人百年幾良  
會緬茲寂寞濱披拂松雲下結廬行卜鄰

松聲樓為行可仕上人賦

南山多巨松空翠拂靈石根蟠茯苓脂寒凝一泓碧結  
樓附清陰下有雲半席天籟發蚪髯神光生琥珀馮虛  
奏韶護震霆鼓潮汐猛若鐵騎奔銜枚襲空壁悄若鶴  
在陰仙音飛九澤嫋嫋如有情泠泠寂無迹道人了不

聞落月滿樓白

送酸齋學士之西川

薊北文章客風流迥不羣  
潮聲秋別夢月色夜留君  
三峽吞秦樹千峰抹楚雲  
形骸捐水石來往更殷勤

山村輓詞

詩窮八十年江海正淒然  
玉塵風生頰青山雪滿顛  
門牆張籍俊墓表孟郊賢  
出處人皆識哀歌徹九泉

送沈敬叔之建德次王性存韻

惜別風花急喚愁江草新鱸魚肥可釣鷗鳥靜相親月  
轉星灘夜潮迴漁浦春贈行無好句家訓足書紳

湖居

負郭輪蹄遠殘春櫻筍佳湖天翻白浪山日黯黃靈夢  
蝶烏皮几觀魚盡舫齋何人契幽賞高致到無懷

中秋見月懷故人

海月大如斗江雲明似霞秋聲歸絡緯暮色起薰葭席  
散金蟾彩衣浮玉露華更深望牛女安得挂星槎

送洪安道歸睦并簡洪君寔

講徹西湖席梅邊袂欲分明經期董子采藥訪桐君畎  
畝經綸手江山錦繡文青溪回首處長嘯倚松雲

靈壁手印篇

有序

漢以江都王女細君嫁烏孫王女過靈壁嘗扶  
以石後人鐫石為模腕節分明故述其事而為  
之辭

漢香飛入烏孫國踰白龍堆行絕域萬里窮愁天一方

曾駐鳴鑣倚靈壁靈壁亭亭立空雪石痕不爛胭脂節  
神飈吹影高撩秋堤雲欲補中原月穹廬作室牆以旃  
佩環魂託胡歌傳當時雙泪洒成血血成碧色苔花堅  
青塚相望去不歸歸時定化黃鵠飛千年恨隔殫城夢  
漢使者過空霑衣

王氏節婦詩

有序

丙子歲天台王氏妻為兵所掠至嵎縣青楓嶺  
啣指題五十六字石上投濔江而死迄今血書

宛然泰定初邑徐丞始上其事請立廟旌之晉  
張仲舉首唱作詩一章邀好事者同賦又聞丙  
子間襄陽賈尚書兒婦韓魏公五世孫也岳州  
破被擄之明日以衣帛嚙指書長詩渡江中流  
自溺而死其詩多有可稱者有江南無謝安塞  
北有王猛之句士大夫咸膾炙之因感其節同  
其事類故并及之云

昔聞江南賈尚書兒婉韓氏身塋魚嘗以血濺雲錦襦



至今波蕩青瓊琚，嚙指堂堂丈夫氣。乃見蒼茫甲兵際，  
倚舷不忍渡中流。翻然直向龍宮遊，嗟嗟赤城王氏妻。  
青楓嶺滑愁雲低，滹江水黑幽魂啼。峭壁萬仞無由梯，  
望夫不來歸路迷。石痕雨碧風淒淒，君臣失國時所偶。  
兒女喪我家何有，丹精貫日昭不朽。朝廷立廟滹江口，  
荆揚孰謂風俗媮。嗚呼貞節無與儔，二女允也忠義流。  
他年太史須編收。

八月十五夜風雨後見月有懷

金月山志 卷一  
天柱峰頭月華碧自古人間風雨隔飄然砍探蟾窟游  
萬里陰霾妬良夕玄雲忽開黃道明顧兔涵秋抱冰魄  
嫦娥偷藥常少年桂子薌霏羽衣濕飛仙挾我凌太清  
萬丈寒光湛虛白美人不來空夜涼白紵歌闌露花積  
登五雲山

普覺遺衣久不傳五雲故色尚蒼然斷崖蘿薜三千丈  
喬木風霜四百年龍井雨深泉獨厚漁村潮上月初圓  
寶坊金碧紅塵聚何以茲山更絕緣

永昌王傳長丈杜伯誠還西涼索賦

時伯誠以王命收書

使星光動斗牛精黼黻文章禮樂成  
青海昔為傳箭地玉關今有讀書聲  
東探禹穴千年迹西望秦雲萬里情  
充棟汗牛寧銜富要期多士答昇平

九日鳳池小集分韻得花字

寂寂禪宮一徑賒傷心搖落異繁華  
錦池冷浸鳳皇影畫壁秋生苔蘚花  
九日江山又風雨百年臺殿自烟霞  
徘徊快拭登臨目更約西湖泛釣槎

金  
卷一  
送曹克明員外之湖廣省

錢唐西望武昌城天際飛舸幾日程三峽波濤下江漢  
九嶷雲霧接巫衡笑談落落蕭曹佐登覽蒼蒼屈宋情  
更把文風變丹雘不須銅柱紀南征

送陳續古之會稽教諭

負笈西遊未十年絕江又泛剡溪船碧窗夜靜雲分榻  
絳帳春吟雪滿壇人憶蘭亭晉文物神留玉筍禹山川  
知君懷古登臨處喬木蒼烟思渺然

送丘以敬淮海山長

中州文學振家聲，英妙當年月旦評。  
鶚薦早登賓貢選，龍飛得被聖恩榮。  
月明潮落金山寺，雪盡江<sub>缺</sub>鐵甕城。  
弦誦洋洋徧淮海，憑高懷古有餘情。

題杜甫麻鞋見天子圖

四郊多壘未還鄉，又別潼關謁鳳翔。  
九廟君臣同辟難，十年弟妹各殊方。  
中原百戰洗兵甲，萬里一身愁虎狼。  
寂寞當時窮獨叟，按圖懷古恨茫茫。

分韻送諸暨胡允文

登瀛藉甚冠多士，入剡蕭然訪故人。  
埜雪推蓬休汎夜，樵風傾蓋穩行春。  
破琴獨羨戴安道，衣錦孰如朱買臣。  
招隱歌闌却乘興，濯纓時復過谿濱。

久旱聞丞相禱雨上竺喜而賦詩

海霞炎日火流金，萬里蒼旻不肯陰。  
山澤那無作霖意，雲霓未得憫農心。  
西湖夜熱波猶沸，南土秋乾雨不淫。  
林下何人坐忘寐，短檠賦罷碧窗深。

方養心自廬山歸

時傳養心已仙去故以丁令威嘲之

萬里扁舟拂釣磯  
琵琶空怨不沾衣  
廬山正想陸修靜  
華表忽聞丁令威  
種杏豈無高士隱  
巢松曾有謫仙歸  
月明夢到西江上  
五老峰前白鶴飛

奉和左轄吳公禱雨天目山有感

乾坤亢旱兵塵後  
廊廟憂深畎畝間  
千里西成望甘澤  
百靈前導謁名山  
清秋雲雨蛟龍窟  
白日雷霆虎豹關  
俄頃神功迴造化  
作霖未許老臣閑

次韻答仲臣梁君

說詩久不來匡鼎千里月明歸思遲  
南國詞臣空擬此  
東關逆旅漫歌噫無才我乏瓊瑤報  
有志君看禮樂施  
安得錦箋三百幅便風日日寄相思

喜得家報

昨夜燈花今夜書西湖歸夢綠陰初  
吟邊欲寫留春意  
呼酒旋烹雙鯉魚

雪夜



水鏡冰凝玉萬家有人和雪嚼梅花  
夜闌酒醒歌招隱  
欲喚扁舟向若耶

又

凌室冲冲已鑿氷兩峰高聳玉稜層  
漁郎睡熟蘆花被  
冷照篷窗雪一燈

過清壑雲扉用吾子行留題韻

縣壁削青雲繞扉挂藤走翠石鉤衣  
洞簫聲遠人何處  
風送岩花撲面飛

題高彥敬竹石

又序

彥敬自跋云草窻出謬紙一幅就破研究僧筆  
磨臭膠墨命寫竹賴有紅酒一尊少助浩然之  
氣故有此君子不可轉之妙態校官仇山村屠  
月汀鄧匪石今歸之吳子靜子靜乃草窗外孫  
故及之

石似於

鳥擇

徒

竹似槎

於擇  
虎也

尚書醉墨洒流霞弁陽寶

繪今餘幾片紙清風想外家

四月十九日與索木魯子昇登雷峰塢

百轉鶯聲兩部蛙不知春色在天涯綠陰千里飛紅雨  
濯錦江邊正浣花

送王君寔赴臺都事

并序

行省都事王公君寔近除南臺都事宸翰所定  
也將行求餞章其人天性至孝以親喪未葬不  
茹葷酒者十有七年省臺交章史館立傳起身  
憲府書吏兩任廉司知事以河南都事而為南

臺監察御史以江浙都事而有是除所至以廉  
能清直見稱

翠埽蛾眉蹴浪花江山乘傳挹清華羽儀要路叅臺閣  
骨鯁平生相國家傳列太常旌孝友班聯御史削奸邪  
遙知案牘無塵務簾捲芙蓉畫煮茶

江月松風集卷一

欽定四庫全書

江月松風集卷二

元 錢惟善 撰

故宮春望次平禹成韻

登臨休賦黍離章  
千里江流接大荒  
劍鎖血華空楚舞  
鏡埋香骨失秦粧  
薜蘿山鬼啼螢苑  
荊棘銅駝卧鹿場  
寂寞萬年枝上月  
夜深猶照舊宮牆

久雨大風二首

蒼生愁暑雨甲子變秋霖風自四方至雲從六月陰聞  
雞休舞劍聽雁欲霑襟渺渺江湖夢區區畎畝心

東南稱樂土旱潦異中原淫雨憂天漏顛風畏海翻旱  
禾登越甸秋水漫吳門學道甘清苦脩然愧飽溫

懷師魯國賓二君子

讀書燈火似秋涼夢筆還成五色章風雨鷄鳴君莫舞  
江湖魚樂我相忘清談常想東西席高卧何須上下牀  
他日遠來山水窟苔花如雪扣漁榔

奎章典籤達兼善除南臺監察御史因寄小詩奉  
賀并簡大龍翔笑隱長老

風雨鷄聲起夜闌相思欲寄翠琅干校讐東壁圖書府  
搏擊南臺耳目官萬里江行過采石九重天語出金鑾  
他年了却埋輪志芋火山中對嬾殘

送趙季文侍嚴君心遠公官浙東帥府

江驛霜晴木葉乾庭闈正喜共之官山中圖史隨賓幕  
海上旌旗擁帥壇島賈獻琛兼百粵秦兒采藥渺三韓

知君覽勝登天姥定駕長風振羽翰

和沈若水山居韻

誰識山中隱者廬白雲無路問樵夫閒將榭葉紉衣佩  
靜試蓮花刻漏壺入海已憐方士拙卧雲偏羨列仙癯  
甕頭春色多藏酒更有琴書足自娛

送吉甫赴江西省同考試

楚士如雲集豫章百年文物自歐陽雕蟲未足追騷雅  
相馬當知出牝黃寶劍徹天占太史

亦作  
晉相

朱簾捲雨讌



滕王此行身價南金重要貢真材作棟梁

早發葑門得風直抵阜林泊

白龍廟前風浪生扁舟初離闔閭城  
嬋娟霜月雁千里顛倒衣裳雞五更  
櫓咎漁歌江入夢帆迎野色樹移城  
葦間何限秋蕭瑟愁絕胡笳出塞聲

寄題邢氏清寧樓

唐微天師題扁

縱目東南極杳冥乾坤萬里正清寧  
檻憑江樹霏烟雨簾捲淮波蕩月星  
賓讌仍招古藤客仙書聊憶紫陽銘

秋風三疊詞難和樓上居人本姓邢

述懷

倦遊湖海十年餘人物如雲想國初貞觀名臣重房杜  
建安才子數應徐聞雞起舞關河壯射虎歸來事業疎  
便欲巢雲尋五老短檠依舊滿床書

送故朱儁卿安厝定山斗門

埋玉空山巷不歌春暉精舍鬱嵯峨籜龍頭角驚雷雨  
木客衣裳雜薜蘿入樹雲霏千點翠出溪泉涌半江波

懷人俯仰成陳迹漫憶蘭亭紀永和

送南泉陰陽教授許存古北上

南遊千里宦桐城春滿錢唐衣繡榮禹穴藏書期太史  
客星犯斗覓君平驛晴馬上看山色江夜燈前聽雨聲  
折柳不堪容易別望雲心遠定懸旌

送浙江憲掾王庭訓遷江西

長西挂席向洪都憲幕諸郎喜有儒鵬鶚九霄同奮擊  
鷗鵬六月快搏扶學傳齊魯文無害詩到匡廬興不孤

草色綠波天共遠尊前莫忘唱吳歎

宮詞二首和符安理鎮撫韻

放生池上月沉鉤掖樹如雲易得秋  
鐘動景陽梳洗早  
輓轡聲轉井榦樓

夢驚鴛瓦落宮牆殿鎖長秋怨夜涼  
教授後庭今白髮  
舊時博士漢披香

題兩童牧二牛圖

齊侯聞飯牛黃帝問牧馬二豎真若人  
三生已忘我應

無醉尉呼莫止宿亭下遲遲高柳陰解衣盤礴羸

杏花

等鶯期燕引遊蜂知隔垂楊第幾重壇近緇帷忘晝永  
宮催羯鼓助春濃絳烟輕潤香鬢裊紅雪乾圓粉泪溶  
寂寞曲江人不見貞元朝士憶時雍

次彥清韻送斯道

葛洪有約遊天竺惠遠無心過石橋溪樹鎖青嵐雨霽  
湖風皺碧岸冰銷忘形野老時分席洗耳山人昔挂瓢

橫碧齋西夢泉上春猿秋鶴定相招

送魯子昇

作吏能忘勢逢人每說詩同庚慚我長莫逆受君知語  
輒傾肝膽情難慰別離江湖還有夢風雨豈無期

即事

壺隱初逃谷樓居欲近江攤書山繞席岸幘月臨窗白  
鳥汙秋策青蟲撲夜釭蕭然無物累靜勝此心降

題賈治安同知秋林平遠圖

軒蓋昂昂五大夫傲然下睨石鳥擇扁舟人似青山瘦  
折簡從來不可呼

送月彥明之台錄事司宣差

入政裁煩劇承恩擢髣髴雲堆舊笈宮錦置新袍台  
嶺連天姥霞城枕海濤絃歌有餘暇送目到金鰲

送陳子敬王子仁

倦遊年少滯江南憂患驚心百不堪韶海有人遺白葛  
洞庭無客寄黃柑涼風拂衽聽喉轉夜雨移燈覆手談

寂寞歲寒梅共我月明索笑碧雲簷

書金字經二首

旃檀香滿梵王居丞相旌旄映使車  
四十二章傳貝葉五千餘卷集金書  
當年鹿苑無文字後世龍龕校魯魚  
要與石經同不朽河清海晏太平初

羲獻能書稱異代騰蘭傳法度流沙  
天香字字融金液雲錦重重疊寶華  
了義何須談般若前身我亦寫楞伽  
儼然似會靈山上欲向龍宮訪大家



西臺都事劉文美東平人來遊江南訪舊今回淮

西

西臺辭紫牘南國泛舟航淮海壯遊夢關山古戰場秋  
風秦樹老春雨楚萍香此際多佳句驚人奪夜光

入蜀題行紀游吳憶講幃一廉伸正氣羣杜畏公非讀  
律師黃卷論文友白衣明時休老去臺閣想風威

山居有懷

窗前草帶不須刪車馬來稀夢亦閒夜雨欲添漁浦浪

夕陽偏照富春山  
豈無高士藏玄豹  
會有幽人寄白鷗  
見說城南春正好  
相期杖履過桃關

春日寄平常居士

硯落燕泥書滿樓  
看山卧到越中遊  
一池春水養科斗  
半樹夕陽指牸牛  
楚簌療饑多筍蕨  
隴雲呈瑞盡來牟  
北窗人在羲皇上  
應埽蒼苔枕石頭

寄題野航亭為洛水陳景文作

靜觀塵水日茫茫  
大地誰能一葦航  
祖笏不妨傳相業

漁蓑正好藉禪床  
晚潮欲上橫春雨  
秋水才深載夕陽  
萬里卧遊唯一息  
白鷗入夢是滄浪

筆床茶具了生涯  
彷彿當時畫舫齋  
雲卧東山思入剡  
雨吟西澗記遊淮  
百年泛宅同漂梗  
萬事虛舟等夢槐  
自是人間閒宰相  
不愁炎瘴過瓊崖

江月松風集卷二

欽定四庫全書

江月松風集卷三

元 錢惟善 撰

洛陽陌

驅車洛陽陌周道何逶遲玉帛走侯甸金湯固城池潘  
令好桃李阮生多路岐銅駝卧荆棘索靖獨先知

隴頭水

嗚咽隴頭水東西流至今胡馬不敢飲野狐時見侵月

明古磧在水合交河陰隴底有白骨啣冤啼夜深

關山月

落落漢時月蕭蕭古戰場揚輝子卿節逐影細君裝  
高卧玉關外低沉青海旁不似閨中夜祇照繡鴛鴦

長安道

車馬如流水樓臺結彩虹王孫來戚里豪士遇扶風  
不睹衣冠盛空聞意氣雄鳶肩亦何事日暮醉新豐

折楊柳

何處好楊柳攀條贈遠行  
花飛度江水客醉蹋歌聲  
秋色彫榆塞春陰接鳳城  
一枝不敢折為近亞夫營

梅花落

笛裏梅花落何處最多愁  
紛飛江月夕吹破隴雲秋  
腸斷白榆塞夢回黃鶴樓  
行人不堪聽雙泪滴孤舟

湘淚竹筵

黃陵廟前捐佩玦  
龍影搖文織湘血  
翠幃塵滴不乾雲  
湘水無聲楚鬼咽  
蠻娘弄作吳娥吟  
五音嘹唳生枯節

一聲直向天上聞手挾飛仙挽秋月  
嗚嗚似向烟中語  
十二螺鬟排律呂黃鶴樓空人不還  
斷腸聲裏招神女  
金銅雙騾裏歌

闔閭城外吳王陵金精化虎曾上騰  
漢侯珠襦爛玉柙  
秦皇銀海燒魚燈佳城鬱鬱三千載  
摩挲長狄今何在  
石田耕破雙裏蹄泉下房星黯無彩  
雲霧晦冥辭夜臺  
朱斑繡澁筆生苔闕哀我弔古伊孰儔  
好事稱是神明  
器我疑出自祁連冢百戰功殉龍種闕



峴山分題送錢德謙之湖州學錄山在州南五里  
唐李適之為別駕嘗登此有酒樽在焉東坡守吳  
興日嘗登之有詩云吳興勝襄陽以吳興襄陽同  
有峴山故也

我昔遊吳興冥搜峴山首前瞻李別駕後仰蘇太守文  
章世爭傳風雨樽不朽登臨豈無人二子名獨久因之  
憶襄陽形勝開闢有羊杜嘗愛之聞望揭星斗致令墮  
淚碑感慨千載後虎據彼則然漁釣此為右兩地雖為

殊能事果同否煩君吊陳迹長歌傳卮酒

蚤起

披衣起危坐心清聞曉鐘流光入窗白月淡西南峰游  
魚躍風藻幽禽翻水松青山如膏沐遠樹烟為容舟人  
與漁子菰蒲深處逢

保叔塢

金刹天開畫鐵簷風語鈴野雲秋共白江樹曉逾青鑿  
屋岩藏雨黏崖石墜星下看湖上客歌吹正沈冥

酸齋學士輓詩

身騎赤虬攬江海手攜錦囊入蘭蓀月明采石懷李白  
日落長沙吊屈原萬里壯遊遺劒履十年高卧老乾坤  
萋萋芳草漢陽路王孫不歸遙斷魂

南谷平章壽福樓落成

壯觀湖山開甲第黑頭宰相考中書氣占牛斗窺南極  
手摘星辰切太虛賓客風流常座滿神仙縹緲好樓居  
飛闌十二標霞外注目吳山千里餘

江心寺分韻得風字送陳輔賢之溫州教授

永嘉美山水物色分禪宮  
斷流金碧倒景驚魚龍  
兩峰橫翠黛雙塔卧彩虹  
齋鼓得寒汐漁歌生晚風  
蕭然地形勝迥覺塵囂空  
維昔有帝子駐蹕鯨濤中  
至今小金焦突兀摩蒼穹  
陳君富春彥五歲稱神童  
三年為博士豈徒事雕蟲  
江心隔千里客星渺孤篷

題華山圖

西嶽秋高翠挿天紫霞堆裏卧神仙  
長生漫憶金莖露

消渴惟思玉井蓮石室有圖空想像洞房無鎖絕攀緣  
遠遊約我乘風氣白谷青崖思渺然

送著作蕪善赴奎章典籤

龍飛天子中興年使者弓旌集後賢閭闔早朝班玉筍  
瀛州夜直賜金蓮五經同異須劉向三絕才名數鄭虔  
黼黻當時遺老在長歌黃鵠送樓船

題夷齊採薇圖

海濱二老共歸周扣馬鷹揚似不侔寂寞西山採薇後

清風未許屬巢由

謝公墩分題送蔡恒之赴建康江寧

鍾陵何鬱蒼中有半山寺緬懷謝公游盤桓此攜妓當時縱清談于今見高致舒王起千載休官老其地蕭然愛茲墩胡為較名字嗟公雅好事閑處亦留意是墩在穹壤正與秋毫似那知人去來豈識姓同異嘗觀達人心於物了無繫道不似町畦情偶似形器君行吊古餘一笑遣塵累

送魏好義尹分水

東來衆水發新安  
歷歷桐川第二灘  
萬疊冷雲藏亂石  
一江春水落驚湍  
青山隔樹連漁浦  
白鳥迎潮入釣壇  
地占客星高隱處  
時飛鳬鴈上雲端

題金明寺圖

金明池涌橐駝虹  
駕幸瓊林歲歲同  
貌虎羽儀陳鹵簿  
魚龍角觝戲珠宮  
樂游臺殿今成沼  
習戰旌旗昔蔽空  
寂寞畫圖傳後鑑  
六飛回首塞池紅

懷泳南江并簡黃晉卿州判

憶宿南山小蘭若蒲床莞席岸烏紗  
掃雲曉辨諸峰樹  
聽雨夜煎雙徑茶  
白傳中原繙貝葉  
遠公何日刻蓮花  
逃空欲辟人間世  
江海蒼茫可泛槎

長洲苑分韻題送于夢臣赴平江經歷

長洲陳迹帶姑蘇  
倒影層臺枕太湖  
綠草一州春走犬  
青楓兩岸夜啼烏  
絕江旌蓋誇吳使  
佩苑文章勝蜀都  
登覽無煩重感慨  
芰荷香裏想乘鳬



題吳和之所藏五麒麟

石名

靈壁幻成麟一角鳴球尚想獸蹌蹌  
泗濱無復供王貢  
木潤玄雲寶繪堂

題柏仲節所藏錢舜舉金碧山水

浩蕩鷗波萬里春回頭車馬九衢塵  
往來共載乘魚客  
揖讓相逢化鶴人苔雲溪山浮紫翠  
蓬萊宮殿涌金銀  
桃花流水知何處猶有征夫遠問津

懷大滌山李坦之徵君古律二首

岩岩石室山高臥如太白餐霞誦黃庭嘯月呼木客軌  
途脫軒冕武庫森羽戟翠瓢酌丹泉清風振重席雖談  
老氏玄猶抱左傳癖曠尋方外遊杳若人間隔飛仙渺  
蓬瀛弱水浮碣石吾將泛星槎子亦躡鳬舄鹿門走冠  
蓋韋布慕岩澤歸去採山中巢雲在蒼壁

嘗思脫屣出塵寰何羨封侯過玉關夷甫不平牛背上  
石生無事馬蹄間家懷萬里藜藜菊樓對西湖面面山  
何日攜書游大滌翠蛟亭下聽潺湲

訪一溪長老宿桂子亭

杖藜清遠溪幽事獨神領澗碧繞嵐霏林綠散風影坐  
忘人間世臥遊塵外境何年猿鳥羣歸來鍊丹井

宰淵徵昇仙詞

武夷九曲水縈迴棹轉歌聲夜壑哀鍊藥偶攜丹鼎去  
乘雲豈待玉棺來夢歸淮海身為鶴壽及喬松背有鮐  
見說仙書遺肘後六丁下取叱風雷

題王氏壽慶堂

先世居蜀

江左衣冠蜀又吳蓬萊清淺見麻姑  
碧桃洞府非塵世玉樹階庭即畫圖  
采藥他年入龍虎捫參何日返魚鳧  
九霞觴進長生酒五色雲中舞鳳雛

題畫扇

六言

銀氣蒸成雲白嵐霏散作空青中有幽人小隱松風澗  
水泠泠

秋熱

融風未肯西秋陽逾六月夢登天姥雲坐想蓬婆雪列

仙好乘空王者勵扇暘若人不復見滄浪一晞髮

送極元講師主四明

杯渡蒼茫不泛槎蓬萊雲氣赤城霞蜃樓上繞靈仙宅  
貝闕潛通海若家畫講風生鐵如意夜禪月照白蓮華  
知師訪舊山陰道細數千峰過若耶

過吳淞江

柔櫓江聲急垂虹曙色分天風搖素浪海日破玄雲肅  
肅夜來雁營營秋後蚊詩成渾不覺漁唱隔烟聞

雲濤軒為吳孟師作

剛仙消搖瑤埃外乘飈穩坐金巖背笑彼壺中縮坤軸  
廣庭何處聆天籟蒼茫豈但豪雋衡浩蕩直欲杯蓬瀛  
蜃氣樓臺倏變幻鶴形車蓋相逢迎須臾回驂向天目  
把帝青珠捫斗縮冷浸瓊田漲水谷倒射龍宮搖貝闕  
前道山靈後河伯笑琢石華拏海月歸來齊居浙江許  
嶧山之碑爛秦雨四壁蕭蕭懸石鼓鍾鼎旂常輕一羽  
日與天香游時歌大人賦夢想澄澄秋萬頃目數英英

春五素東海揚塵走蒼狗勸君且酌杯中酒一息萬里  
且搔首更招子虛問烏有

輓傅景文

卧病西湖曲招魂富渚陽賦高唐八韻律熟漢三章丹  
旆風為馬青山石化羊應從赤松子不見少微光

悼西山猿

老衲敲松喚不還黑衣何處落潺湲似曾索果西湖上  
無復號弓楚峽間挂月影沈千尺樹嘯雲聲斷萬重山

羈雌寂寞成孤怨更約他山獻玉環

喜白髮為陳師復賦

勲業無成散似樗青銅欣見二毛初中郎興動秋風起  
太傅詩成壯歲餘皎皎易汙時一沐星星難染漫千梳  
等閒得此無情物自有忘憂滿架書

華顛何必嘆浮生正數朝梳雪數莖黔首難愚秦子弟  
馬肝空賜漢公卿不愁春去成雲往唯愛秋來對月明  
老去故人容易別登山臨水更多情



題廣微天師昇龍圖

噓氣成雲薄太清  
墨卿靈怪研池腥  
波濤光彩失雙劍  
風雨晦冥驅六丁  
朱火騰空超碧落  
翠鱗垂水捲滄溟  
真人上挾飛仙去  
安得攀髯過紫庭

題節婦呂氏傳後

有序

節婦婺州永康何季長妻  
季長得北山何公魯齋王公學  
父子舉其學出西山真公鶴山魏公  
學者稱寬居先生  
節婦年二十九季長卒有一

子名述生甫三月時南江寇盜充斥人死兵戈者十八九呂氏能披荆棘犯霜露保育其子若女且全其家至治二年春二月郡邑長吏文學博士奉承詔旨備醪餼具禮幣旌表其門

世變廢居日永清斷織時始知家學舊不與國風衰旌表神明裔流傳絕妙詞柏舟懷往古鳥繞越南枝

江月松風集卷三

欽定四庫全書

江月松風集卷四

元 錢惟善 撰

杭學初正講座憲使吳公命也詩以美之

使君天下士草木知名姓威風凜直指恩露承寵命柏  
府往簽司薇垣前東政繡衣重監臨驄馬相照映齋沐  
謁黉宮釋菜見先聖拜跪瞻衮冕憂擊備鐘磬衿佩歌  
鹿鳴牙纛肅魚騰升堂成揖讓振席竦觀聽教由師匠

尊禮始臯比正巍坐煥且嚴高談響斯應道統續泗沂  
造詣希顏孟經籍光日星訓詁過王鄭皇家羅俊英鄉  
賓推孝行六館四方萃五老萬乘敬被漸王化遠絃誦  
士風盛微公孰舉揚有識咸贊詠儀渠一旦新黼黻千  
載慶公賢如昌黎公學似安定辭闕異端熾業肆諸生  
泳不棄小有才所貴焉用佞去邪直踰繩燭幽明比鏡  
客憐敝貂蘓衆援飯牛甯興歸月旦評事待秋風請鳳  
池山公啓冠豸湯子諍何時居中書蒼生慰懸磬

贈真風道人

平生遠慕列禦寇御風冷然九州九西行入秦北走燕  
東浮並海南窺斗漆園傲吏八極游崆峒真人千歲壽  
消搖更上歌風臺弔古戰場一杯酒

題龍虎孫希文尊師為蕭泰定所作丹房寓隱圖  
結茅雲裏萬塵空辟穀相期伴赤松晝夜常明羽人國  
春秋不老蓋仙宮飛騰舐藥容鷄犬蟠伏成形看虎龍  
縮地壺天今有術願辭羈絆問叅同

春遊曲和傅子通韻

蛾眉曉壓黛雲冷  
蟻波綠泛秋蛇影  
千金難買能賦人  
輓轡升沉舊宮井  
青絲不梳慵早起  
十二螺鬟翠相倚  
鸚鵡解言天上愁  
紅雨香漂御溝水  
曦車急急催飛光  
杯中淺深愁短長  
東隣誰唱斷腸曲  
游絲落絮春茫茫

金蓮

凌波仙子出塵姿  
飛燕身輕太液池  
翠蓋紅裳空裊娜  
錦心黃素自清奇  
美人襯步行春處  
學士承恩照夜時

五老峰高誰攬秀卧游閒對碧漣漪

定山十詠

風水二洞

洞在定山南稚川嘗鍊丹于此東坡與李節推  
同遊唱和見集中方玄英許郢州林和靖皆有  
詩

空穴來風自吸噓垂岩出水水渠渠天門此際通閭闔  
海眼何年池尾閭隱者難招應化鶴飛仙可挾更乘魚

留題太守懷蘇白好事今無五馬車

鳳凰雙髻

鳳凰山名在定山西其頂有兩峰儼然如髻形  
鳳來天目憩東南瓊樹巢空百鳥慚千仞翱翔秋綰髻  
兩髻髻髻暮棲嵐誰嘲風落烏紗帽自借山為碧玉簪  
仙女洗頭休望岳相期岸幘對虛談

朱梁夜泊

在定山北江船抵暮或避風俱泊橋下



長虹下飲逆流渾雪色沙寒石闢喧晚飯鐘催隣驛寺  
寄漁燈映並山村月明欲解江靈語風橫難招海賈魂  
省得楓橋曾繫纜一篷烟雨夢吳門

### 定山早行

謝靈運富春渚詩有曰定山面雪霧即此也

前峰月吐四更初空翠沾衣積雨餘溪火夜明經略約  
澗雲秋重負簾篠篠林虎與人爭畔茅屋雞催客趁虛  
不似關山行役者勞勞服賈遠牽車

六和觀月

在定山北山名月輪寺臨大江遇月尤奇古錢  
唐令張君房曾宿此寺月中桂子下塔如牽牛  
子咀之無味

招提高轉月輪峰樓閣清虛十二重秋憶天香飄古桂  
冷凝岩雪落長空池光照夜明金鯽塔影橫江卧玉龍  
聞道廣寒從此往竹房開處約飛筇

五雲賞雪

在定山北梁普覺禪師道場宋故事每歲臘前  
主僧奉表以雪進黎明城中霰猶未集蓋其地  
特高故寒云

獻瑞名山自昔聞化人臺殿雜金闕樹靈尚吐三花秀  
雲凍全消五色文鳥絕空江知棹泊鹿迷深徑待樵分  
興來更上高寒處此境應無蕭使君

龍門曉雨

在定山西兩峰壁立如門上有龍潭能興雲雨

歲旱禱之輒應

神劉峭壁竦雙扉雨挾腥風下翠微  
黑入太陰迷爽氣白翻藪薄散朝霏  
螺橫襍樹應藏景蛟吐癡雲未霽威  
回首他山新似沐登樓時攬女蘿衣

漁浦春潮

與定山相對謝靈運富春渚詩有曰宵濟漁浦  
潭者是也邱希範亦有旦發漁浦潭作

江漲夜來高幾尋輕濤拍岸失蹄涔  
遲明帆發星灘遠

盡日舟橫雨渡深，杜若風回蘋鯉上。  
桃花浪起白鷗沉，越人艇子來何處？  
欸乃若聞空外音。

浮嶼藏魚

在定山側浮江如盤石，下有潭聚魚玲瓏可觀。  
潮出海門中，分為兩派。東派沿越岸，向富春西。  
派則直抵茲山，而迴。諺謂之回頭浪。

潭色空澄，島影孤潛。鱗時出，迺天吳浪吞。泗磬秋浮玉。  
月照驪龍夜吐珠。萬騎西來，疑灩澦扁舟東去。想陶朱。

投淵每笑窮漁者何處烟波覓釣徒

浙江耀武

將壇在定山北每歲春秋萬夫長分翼江上帥  
士卒習水戰于此

年年江上習舟師故事相傳劫火池春日樓船觀晉相  
秋風弓弩學吳兒素車白馬迎旂隼紫鳳玄夷畏虎貌  
日暮元戎歸細柳散花洲畔凱歌時

觀廢宮城

吾聞女媧氏立極斬鰲足又聞帝軒轅疆理定坤軸外  
以禦裔夷上以應列宿犬牙各有分雉堞遙相屬後世  
慎屏翰磐石固宗族召伯力營謝齊侯重城濮下逮虎  
視秦壯勞萬里築漢興閭左戍子嬰天下戮在德不在  
險此理甚昭燭商辛尚雕峻劉徹務窮黷季氏憂顛更  
公孫恃巴蜀胡云歷代亡不鑒前車覆惟昔宋南渡錢  
唐稱輦轂衣冠晉王謝鼎社周郊鄆地氣有回旋天道  
好反覆長江既失守炎祚乃訖錄江山仍畫圖廟闕盡

回祿載瞻金瞿曇願號缺

毒恢基鏤女牆分甌甃僧

屋壞灰餘雪彩朽壁爛椒馥色侵禁籞莎根蟠故宮木  
內湖亂蒲荷人家種荀首懷古感耆父攀危讓童牧哀  
哀雁孤鳴啾啾鬼陰哭歌殊彼忝離傷深茂草鞠千年  
城復隍萬變岸為谷撫膺慨金湯臨風送鴻鶩秋風遠  
埽蒼夕陽聊送目平生渺堪輿藏可一粒粟盛衰傳自  
然不實戒吾辱

過環山求虞卿家訪申屠光遠



千峰繚繞似環滁中有幽人此著書三徑曾陪羊仲入  
一亭還擬醉翁居晚風馬上花難折春日窻前草不除  
可喜異鄉同是客它年絕跡樹為廬

久旱酷熱以杜詩林熱鳥張口為韻分得口字

朱鳥居炎荒蒼龍集癸酉陽烏爍雲漢山蜩脫塵垢天  
瓢韜玉符風鐸絨金口洞庭收雨工常山潛電母魚跳  
渾渾波龜拆每每畝渴想秦陵瓜虛懷華峰藕懽應遲  
御史寬豈在孝婦載瞻天咫尺願賜水升斗

劉時守待制見和定山十咏作詩以謝

玉缺

士來湘中笑攬衡嶽吞雲夢西瞻蛾眉呼太白

南望蒼梧登祝融射魚昔號玄真子樵青隨處携詩筒  
扁舟匹馬萬里外曾渡瀛海過崆峒識荆載拜二十載  
棄襦誰復憐終童辭官錢唐聽江雨願言擊壤歌元豐  
定山品題缺自靈屹然當道江爭雄雲泉靈洞自奇絕  
燒丹嘗聞留葛洪浮山下鑠蛟龍窟百川砥石為之東  
五雲高標太古雪日輪日上清虛宮招提翬飛翥龍鳳

漁子暝宿蘆花風是間勝槩難指數作者往往皆名公  
山靈昨夜見我夢喜得珠玉傳無窮杖屨何時此幽討  
潤色舊觀重發蒙問公前身竟是誰香山居士東坡翁  
分題賦三高亭送王彥昭之平江

長往非求身後名此亭高占五湖情歸吳豈為蓴鱸計  
去越終偕粉黛行漁子一時隨獺祭詩人千載預鷗盟  
筆牀茶具扁舟興還約烟波老此生

近竹軒

參差翠繞屋西偏手種琅玕已十年座有清風多簡冊  
門無俗客勝林泉北窗夢到羲皇上東里家居剡水前  
投老此君同寂寞橫經才罷又鳴絃

題江行圖

七澤秋連楚雨昏布帆千里向荆門舟行莫近清湘泊  
楓樹青青亦有猿

故廸功郎項君挽辭

君諱猷字用文台州寧海人也國朝取宋之師

在江上時宰拜表請出督戰風所私具疏留已  
鄉校試諸生以裴度征淮西事為問君設對極  
論時事斥其情狀讀史漢忠義節槩之事必感  
慨或至垂涕以廸功郎浙東提刑司準遣而國  
亡矣大德中嘗具便宜二十事為書萬言將上  
之既而自名退翁以終其身至大三年夏五月  
壬辰卒年五十七後十六年當泰定三年冬十  
一月壬子塋

江海之官後乾坤革命初醉醒千日酒出處萬言書  
落忠臣傳名全義士廬使公躋上壽應可致安車

望雨

落月相隨曉挈瓶井甬何處汲清泠雲霓失望憂千里  
河漢成章耿七星驅厲文能誦風伯禱龍官屢謁山靈  
孰知太守勤民念歌市重看喜雨亭

送張仲舉赴昇庠訓導

巷居身已困流傳江海聲名四十年鸚鵡賦成因鶚表

斗牛光輒見龍泉史雲豈肯留賓閣  
僕載終期缺帝前  
若到秣陵應攷古未容秋興理漁船

次陳君瑞遊鳳皇山光明寺

左瞻劒戟龍門並上脫冠巾鳳髻雙  
齋近木魚鳴畫廡  
行遲松鼠落晴窻雲深不覺山藏寺  
溪漲應隨雨到江  
未識此中真樂地三生先喜俗緣降

芙蓉次斯道韻

池上殷紅一萬枝紛披應不為秋衰  
錦城主者愁風雨

玉案仙人浣粉脂  
蘭棹涉江辭  
越女雲裳擁水却  
馮夷  
月明四十餘里路  
夜宴何須步障施

江聲得五字

小海歌闌渺平楚  
中流日暮猶鳴櫓  
怪疑鐵笛和龍吟  
清應冰絃出魚舞  
響入蘆花暗長潮  
寒吞樹影晴飛雨  
湖源欲聽巫峽秋  
夢繞峨眉月三五

竹軒為吳江朱君賦

若人嵇阮流  
高標疇敢伍  
家居近吳松  
種玉繞環堵  
寒



碧千畝雲秋聲四簷雨開徑友元卿瞻淇師衛武怡情  
即邱壑忘形孰賓主徑造謝輪蹄眩搖雙碧吐

缺題

缺

火心靈養寸丹寂寞剡中餘野興裴回歲杪接農懽  
山川何處真奇絕晴泛扁舟十八灘

苦熱夜坐

樓居小溪上涼生二更後流螢入深竹鳴蜩息高柳浩

歌欲凌歊新浴聊去垢靜引白團扇沉思碧筒酒散髮  
濯風露開窻納星斗明河與海通皓月隨行走賞幽勿  
造玄佳句難成偶所懷不可招南澗蒼髯叟

江月松風集卷四

欽定四庫全書

江月松風集卷五

元 錢惟善 撰

三月既望求虞卿申屠光遠葉子實諸友載酒過  
西山酌右丞公墓飲泉菊亭

真人漢飛龍孺子羸失鹿三輔歸版圖九月走臣僕豫  
章收楚材遺珠貢揚牧黃鵠下瑤池白駒出空谷緬惟  
右轄公戎裝映儒服堂堂貴黥相便便夢松腹騎箕感

商宗烹雉遇秦繆英雄北海孔詞藻東吳陸一時彗星  
䟽萬里儋州禿名因直言奮恩被昭代錄虎賁與承明  
紫微端秉軸羊裘耕富春赤松期辟穀翩然五湖舟南  
歸得休沐首丘全要領不貽隴西辱我生後百年慕蘭  
仰高躅相逢盛德後再行西山麓佳城何鬱鬱真氣殊  
肅肅至今白雲裏猶藏君賜轂麗句吟月梅遺文記泉  
菊玉筋丞相篆寒芒射人目彼哉負國者地下有餘戮  
公乎不可作醜酒塚上木

奉和太常博士柳公浦陽十咏詩

仙華岩雲

縣北有仙華岩翠掌浮空雪景尤奇

仙華生白夜光澄五指分明最上層  
冰凍金莖承沆瀣月寒玉筍插觚稜  
麻姑雨蓋從空降少女雲輶自此升  
幾欲凌空披鶴氅剛風浩渺興難乘

白石湫雲

白石龍湫在縣東南能出雲為雨

雲雨深涵白石泓魚鱗屋冷氣輕清中藏異瑞成銀甕  
下隱神蛟見句嬰岩客裁詩春靄靄山靈澤物夜英英  
誰因肺渴嫌寒冽澗底歸來更拾荊

龍峰孤塔

在縣東龍峰古塔實為蒼龍左角

巋然特立梵王宮梯級惟容鳥道通翠壁雲綃經劫火  
鐵簷鈴雨落秋風高標挿漢蒼龍左倒影橫江白鶴東  
何日捫蘿尋勝跡不愁千里目難窮

寶掌冷泉

寶掌山唐千歲和尚道場有看經行道洞巖竇

出泉極甘寒

清冷寒沁白芙蓉靈物蜿蜒古有龍山見曇華森寶掌  
洞藏貝葉和金鐘聽猿欲訪三生石見鶴還疑五老峰  
赤脚只從泉上去蕭然卧雪看雲松

月泉春夜

月泉書院祠朱呂二先生學者肄業其中

卷五  
泉在空山月在天東萊夫子武夷仙擔簦有客來長白  
載酒何人學太玄心印寒潭同皎潔書聲春雨襍潺湲  
一燈肯借棲松桂飽聽南薰鼓舜絃

南江夕照

南江橋西望原麓返照如畫圖中

目盡江南送夕陽空明直下接漁梁千重雲岫連平遠  
五色霜林映渺茫孤鷺倒飛天上下長虹高卧水中央  
白雲紅稻多秋思付與詩翁了醉鄉



潮溪夜漁

去縣五十里溪流始大有魚蝦之產

魚蝦溪產正鮮肥水沒蘆花舊釣磯  
簞簞候潮秋得計參差吹月暮忘歸  
九淵貝闕疑龍國一道鷗波似鮎埼  
黃帽擢歌回夜半船頭高卧綠蓑衣

東嶺秋陰

縣東東山嶺平林廣野秋常多陰

青山失色暗丹楓廣埜平林杳靄中  
半嶺無雲時慘澹

尺天不雨亦空濛冥冥南向藏玄豹漠漠東開見白鴻  
高處夕陽難攬結埽除陰翳待雄風

深褭江源

浦陽江源出深褭山在縣西十里

深褭淵源萬古流溯洄誰解泛扁舟險疑灩澦來巴蜀  
高訝崑崙近斗牛混混直從開闢有洋洋未許網羅求  
東行須過浦陽浦清咏難追謝守遊

昭靈仙蹟

昔黃帝少女于仙華巖上昇下有昭靈廟水旱  
禱之輒應

肌膚冰雪貌姑人此地昭靈迹未陳華表鶴歸終解語  
鼎湖龍起後攀鱗雨香寶穡瓊田晚露冷琪花碧澗春  
仙馭時隨青鳥去定陪崑圃宴羣真

半閒雲

白衣蒼狗自悠悠川上山中任去留賓主已忘同舍宿  
神仙何事帝鄉遊無心更出千峰雨有約平分一榻秋

寄與聽松閒宰相好來怡悅伴湯休

瓊花賦管侯家所植者

廣陵移種謝家池折却東風第一枝  
承露掌寒生玉粟鬱金香重綴冰蕤  
女車曾過唐昌觀煬帝空游后土祠  
十二闌干天上夢看花應不似當時

故翰林待制劉公時中挽詞

平生寶繪燎秦灰有酒長教笑口開  
中夜聞鷄曾起舞晚年愛菊竟歸來  
聖賢欲獻王褒頌絳灌那知賈誼才

悵望龜溪埋玉後  
湘江雨濕釣磯苔

奉送前御史監察河南僉事達兼善移官淮西三

十韻

弱冠魁高第  
臚傳孰雁行  
臨軒知主聖  
獻頌屬臣良  
御酒頒光祿  
恩袍出尚方  
聲華初赫奕  
眉宇最清揚  
秉筆居青瑣  
登瀛步玉堂  
窮經聞道統  
瑞世應文昌  
慣立螭頭陛  
曾含雞舌香  
奠階瞻日表  
芸閣待奎章  
才可雛東觀  
勲宜紀太常  
玉書探禹穴  
石鼓識陳倉  
學士陪天上

詞官近帝旁規忠進洪範斬佞請干將烏府風雲會金  
陵壁壘彊法嚴秦御史篆逼漢中郎薦剡符輿論褰帷  
肅憲綱在庭我獬豸當道去豺狼拜命辭中禁分司震  
大梁舉賢持藻鑑務本篤耕桑往事摩銅狄終身感素  
王金鰲憑要眇鯨海入蒼茫舊約桃花縣新除枳子鄉  
攜家來恰犢乘驛度餘艎講易懷龍井論詩擊燕缺同  
心如律呂分手未參商楚望陵藩屏徐方接要荒石牛  
仍角觝金斗直光芒山憶浮槎至州傳戰艦藏絕江應

泛月入境定飛霜人物周公瑾神仙魏伯陽長淮萬里  
外鵬鷲正翱翔

曉入白岩山

樵橋低小路縈迴樹裏人家門未開馬上西風涼似雨  
濕雲吹下白岩來

又

騎馬入亂峰乘流絕溪渡曉來岩上風吹落樹頭露  
故發錄事文林周公挽詞

東南耆舊半彫零，士類於公見典型。  
秋色愁予兩淚雨，夜光墜地一文星。  
扶搖嘗擊三千水，富貴將登五十齡。  
為縣有能公論在，傳家清白遺麟經。

凝塵冉冉總帷寒，痛絕郎君問曉寒。  
進士杏園三月宴，勞人花縣十年官。  
山中圖史遺雙硯，海內才名惜二難。  
此別豈知成隔世，西風吹淚洒秋蘭。

却埽城南水竹居，病多時讀養生書。  
四知清節辭金際，五字新詩夢草餘。  
聽雨每留聯臥榻，看山空約借肩輿。



天台高遠濤江潤丹旒翩翩祖奠初

滿城縣學瑞芝

并序

浙西憲府經歷汲郡劉君瑞卿前為滿城縣宰  
新修孔子廟時天歷元年冬也越明年有芝草  
七華一莖生大成殿中右楹礎石上監察御史  
南鄭王君伯成序其事于是諸公作詩以美之  
有美滿城宰芝生孔子堂文明來瑞異德化見慈祥類  
水魯歌頌齋房漢樂章因之挹眉宇髯戟冷秋霜

題郭天錫山水

擁腫無根山癩頭銀雲截翠半空游酒醒拭目知何處  
華嶽飛來一片秋

秋熱得雨有懷

今夏五月涼殘暑不易過楚氣蒸火雲商飈動塵堞涸  
澤鱣魚虞大夏燕雀賀寒泉當晝濯茂樹終日坐玄白  
逃士嘲丹鉛督兒課蛟龍候帝符霖雨須王佐力田歲  
乃旱良農心亦墮忽爾天瓢傾令我客愁破萬事付鷗

波百年同蟻磨秋高海濤北夜朗江月大天香桂一枝  
地籟竹千箇懷人當此時狂歌誰敢和

東叔仁并寄子平徵君

天際長風送曉帆林深空翠裊春衫新知傾蓋渾如舊  
多病論詩迥不凡紅雨入窻花簌簌蒼雲穿壁笋纖纖  
子陵臺畔能同隱何必商山與傅巖

述懷寄光遠并東城南諸友

野人無事久忘機肯信紛華有是非花信欲闌鶯百轉

麥芒初長雉雙飛書中歲月仍為客枕上江山屢夢歸  
時復思君倚深樹不知殘雨濕春衣

青青草色接平蕪翠涌千峰入座隅戴勝晨呼采桑女  
於菟夜警牧豬奴羽觴洛水聞修禊單袷溫泉想舞雩  
欲泛蘭舟過春渚一樓烟雨似西湖

紅塵飛不到岩棲燕子人家樹木低兩岸春風吹杜若  
一株寒雨入棠梨指桐仙去山中邑訪戴人非雪後溪  
幾夜思親唯有夢柳花路上蹋香泥

書懷

春夢渾難記年光不可留  
絮輕隨野馬堪熟醉林鳩  
綠樹深藏徑青山直上樓  
功名等閒事一笑拂吳鉤

偶成

苔花洗春雨藉此聽潺湲  
終日無客至滿樓都是山

寄光遠

沙淨花如雪江昏雨似絲  
山靈揚鬼火木客和人詩  
萬里丈夫志十年童子師  
此行深自愧未謁子陵祠

上巳懷古二首

泛雪舟杭似剡中種瓜丘壠想江東當年三鶴成陳迹  
只有青山尚姓桐

不見風流葉右丞橫山陳迹復誰登老拳曾醒將軍醉  
當日蘭亭恐未能

寄求唐卿

求仲不來閒竹徑子陵難見隔雲山已拚斗酒留春住  
更約扁舟載月還

富春附海舶還省侍望拜子陵祠堂

祥飈來西南五兩候明發龍驤萬斛輕鼉鳴五音節烹  
羊祭波臣巨壑東連渤饋餉方走燕樓船不征越時余  
游富春附載看山笏望拜子陵祠客星炯林樾他年如  
陸行辦香重上謁歸來見慈顏懽喜入心骨嗟爾畎畝  
民輕命鯨窟啖利亦細微風濤乃倉卒渺渺三神山  
蒼蒼一毫髮鞭石笑秦皇欲令海濤竭至今采藥人島  
上成珠闕疇能往從之桃花千歲月

送李士廉調浙東帥府史并柬石室禪師

借問東遊何日還  
滿城柳色唱陽關  
惜花心老笙詩裏  
夢草吟新案牘間  
兩地相思幾風雨  
片雲只隔一江山  
老禪雪竇非塵世  
試聽玄談半日閒

送姑孰陶性之學正赴京師求仕

赤縣觀光日青雲發軔初  
長楊應獻賦行李只挑書  
五柳嘗歸去三茅非隱居  
聖明今在上未仕復何如

賦酪櫻桃



聞道醅醕稱螭櫻熟紅仍帶露香傾冰漿出盃和崖蜜  
火齊堆盤化水精樊素口脂難並美烏孫肉食漫傷情  
尊前從此誇風味專與歌姬解宿酲

送陳輔賢侍母之柳州興寧簿

十年學就何蕃舍百里才淹楚子邦桂嶺風霜連橘井  
洞庭烟浪接郴江維舟夜聽啼猿獨入饌朝供躍鯉雙  
別後夢魂思舊業富春山遶白雲窗

送王景賢侍母之閩省父

雲海移親舍天風送客梳求書吳子國訪古粵王臺嵐  
氣千峰雨灘聲半夜雷燕山翻入夢一路桂花開

送桂希賢還四明

爾家住近慈溪曲陟岵觀雲客身獨一行作吏走官府  
十載明經笑場屋丈夫落落志四方讀律師古卑申商  
養親寧免干升斗取士未可拘尋常江山清竒數明越  
千里東歸正炎熱禱雲處處望霖雨息蔭時時防道暍  
扁舟早發江之臯別酒滿酌新蒲萄亟趨庭闈侍扇枕

重來應及秋風高

江月松風集卷五

欽定四庫全書

江月松風集卷六

元 錢惟善 撰

題濮陽老人手卷

濮陽老人年七十一身白屋勝朱扉往來岐路風波險  
搖落江潭樹木稀坐上歌聲彈劍鐵壁間燈影挂弓衣  
故山何處交遊盡歲歲春來送雁歸

送魏好義宰樂清

樂清茂宰之官去山瘦溪寒一路秋月下鮫人來象浦  
雲間禪衲徧龍湫絃歌百里兼農事翰墨三年了宦遊  
王謝登臨舊岩壑不妨退食繼風流

送李德夫福建運司書吏

吳柳初黃越樹丹照人秋色送征鞍雲隨親舍回揚子  
山引郵城入候官萬古鹽饒輸海賦兩潮漁上助盤飧  
武夷我有南遊約欲借扶搖駕羽翰

十六夜登拱北樓看月蝕

龍宮涌出白蓮花拱北樓高疊鼓撾萬里光輝瞻玉兔  
三分破缺食金暮長歌野老頭垂白再拜微臣額跼沙  
夜半冰輪復端正誰從海上泛靈槎

寄中竺長老竹泉禪師

嘗過石橋尋遠公塵緣未得一相逢澗聲如雨月明夜  
兩箇猿啼千丈松

送馬士瞻北上

十五年前烏府掾說書幕下最風流陳情似聞李令伯

好事復見韓荊州五弦手彈海月曉一櫂夢到江雲秋  
此去定除山水郡依紅泛綠肯同遊

東柯博士

芸香閣下丹邱生十年不見雙眼明圖書一代聚東壁  
風浪扁舟歸赤城落筆楚山春雨曉披襟海岳秋天晴  
欲求樹石挂林屋夜半只愁神鬼驚

賦歲晚江村

何地謀生樂吾農卒歲晴不辭王賦重但願泰階平水



縮江聲落風餐雪意成同雲如可解斜日尚能明

送李時方回東平

吳山青入縣門來一徑蕭蕭長綠苔南國棠陰遺老頌  
西河柳色故人杯九天應戴神羊立千里仍騎瘦馬迴  
別後逋仙更相憶東風開徧手栽梅

壽松老人汪拱宸八秩

蒼髯綠髮古仙翁身住空同第幾峰欲采紫芝從綺皓  
却摩銅狄問喬松珠明秋水蟠胎老酒釀春花琥珀濃

冰雪相看彌壽父此生夢不到秦封

賀段吉甫新任照磨江浙行省

祥琴初撫拜新除喜劇彈冠欲廢書南省并從丞相幕  
西山相對騎曹居黃衫分宴參珠履華服承顏侍板輿  
聞道詞章多藻麗紫薇香露筆花舒

王敏夫挽詞

十歲能詩早絕倫前身應是玉樓人共稱王勃天才敏  
自顧虞翻骨相屯龍劍篋空啼鬼母象車賦好冠王賓

西山何處埋瓊樹愁絕梅花野水濱

元日紀事

望闕衣冠拜紫宸九重鳴樂奏韶鈞上天膏澤何多雨  
下土萌芽自發春門外泥深騎馬滑橋邊水上倚樓頻  
餓寒最喜條風早歌罷青陽已得辛

初春聽雨

殘年立春十日雨客子聽雨萬端憂五更狼籍梅花雪  
一似蕭騷梧葉秋埜岸宿雲穿樹出湖天新漲壓城流

一晴鳴鳥在窗戶拄杖相期載酒遊

元日次韻

朝廷有道荷天恩元日嘗陰寘勿論春事憑梅問消息  
年華看竹長兒孫田翁火炬占風色海鬼桃枝蝕浪痕  
送故迎新無限意不妨醉倒罄壺尊

次韻黃孟成貽墨齋先生

翩翩佳公子吳娃相勸酒便娟杜曲花依約章臺柳寄  
書魚滿尺買笑珠論斗若非玉堂仙定是金谷友

與默齋先生聯句成口號

官柳新晴啼乳鴉外甥昨夜喜還家  
河鮑江鱗都供酌獨奈春寒惱杏花

春風吹開杜若花春日多病憶還家  
自是老懷容易惡錯怨鄰女弄琵琶

菊隱為求唐卿賦

聞說富陽求處士百年心事付黃花  
九英燦爛秋餐露六氣澄清旦食霞  
種竹門前同蔣徑見山籬下似陶家

兒童報道松醪熟便漉烏巾不待賒

運司經歷范明府致仕歸太原

海玉篇章細討論白頭幕府最承恩  
吳鹽美利踰猗氏晉產奇材過大宛  
江上春潮桃葉滿道旁夜月李花繁  
島居民力罷煎竈扶策何時叩帝閭

送梁叔遠

久慕張翰入洛年束書未覓賀循船  
綠波草色江南岸絳闕虹光冀北天  
異路飛騰辭狗監故鄉拜掃識牛眠

臨歧愧乏黃金贈爛醉桃花酒十千

送王文正還魚臺

春雨杏花落縑帷方讀書江河行泛鷁鄉邑夢觀魚作  
賦殊王粲明經埒魏舒慚無繞朝策握手更躊躇

元宵月蝕

不復燒燈似往年無風簾幙看嬋娟彈箏玉宇明千里  
伐鼓氷輪沒半邊不信中秋有妖孽可憐今夜最清圓  
五更光魄渾依舊怪語深慙盧玉川

粉團花下夜飲

萬花碎煎玉團團晴雪飛香夜不寒恰似玉人相對立  
酒尊移月近前看

姑射仙人白羽麾夜深和月下瑤池落英散作白蝴蝶  
香滿東風金屈卮

題錢選毛女

槲葉紉衣紺髮青宮粧變盡尚娉婷君王若問長生樂  
只有胡麻與伏靈



送滕義甫赴建康學訓導

建業山川似伊洛故人文藻並應徐佩衿北面諸侯學  
幣帛東來御史書宮樹雲荒龍映虎岸花風細雀啣魚  
明年定有公車召却擬橫經論石渠

次孟伯貞韻寄罕玉庭

道人新刻蓮花漏不肯出城頭髮長一榻松風時入定  
半簾梅雨晝燒香溪聲衝激青林曉山氣侵陵白苧涼  
見說移居舊安養我來翻恐老僧忙

端午日與劉環翁遊故內寺

百尺青銅宮井西當時曾見鳳來栖  
轆轤響絕西風起從此月明烏夜啼

題竹石

怪石蹲虎爭欲射老竹化龍誰敢騎  
飛將不來仙客去向日海霧精靈悲

次韻晨起二章用答吳寅夫見憶

晨起悅新沐散髮風霧涼沉沉北窻雨  
素書閱岐黃燕

坐萬念寂空林  
簷蔔香思君成夢寐  
春草滿池塘  
晨起坐高閣  
焚香誦黃庭  
樹合野雲碧  
山浮江雨青  
神不在尊俎  
酒香肴亦馨  
扁舟望子久  
拏音未由聆

建德山中洪水雨後作寄默齋從事

鴻發瀟湘郡  
瀕洞裂崖石  
蛟蜃夜移居  
雞犬朝失宅  
客子憂緒繁  
江山亂清碧  
杖藜不出門  
行潦高數尺  
螢火息風條  
窗戶雨氣積  
涼月盪殘暉  
光照床頭白  
床上無所有  
芸香二三策  
懷人耿無寐  
披襟坐通昔

送洪省吾歸淳安

君家山水鄉，耆舊半遺逸。讀書錦溪上，平生事著述。識君因令弟，晤言能幾日。相見既遲暮，賦歸復倉卒。雨林碧冥冥，雲嶺青律律。岩石忽破裂，江波尚奔溢。扁舟從此逝，六月海風慄。余聞彼山中，美木多椅漆。山水有餘音，為我斷琴瑟。斷成倘相遺，鼓以軒轅律。豈無薰風來，返我太古質。君歸與世違，幽栖保貞吉。濯纓松下流，長嘯時抱膝。寄語山中人，悠哉勿輕出。

送月明德從左丞相公入貢朝賀

送客江河秋潦新涼風似水月如銀掄才南省儀曹掾  
進賀中宮贊相臣野濶斗牛連折木天高玄武直鉤陳  
清尊九月都門道定對黃花憶故人

八月二日夜與仲仁孟宣同坐聽雨

寂寞陳蕃榻清秋坐鄉晨乾坤同是客風雨獨愁人巷  
閑休沽酒燈明更接茵詩成還寄遠欲采越江蘋

再送梁叔原

二月曾期上國游遲遲行李又經秋月明太液飛黃鵠  
塵滿長安躍紫騮兩榜名門見喬梓一尊故里酌松楸  
楚楓初赤吳雲白若過蕪城試倚樓


題張仙人隱居圖

百年曹氏宅萬古張仙山藏書白雲裏結屋青林間  
衆筵石虹裂樹深溪鳥閒我欲從子遁騎驢相往還

洪安道挽詩

自悲獻玉屢無功夜壑藏身萬事空家學一編耽傳癖

客懷千首坐詩窮  
梅花有約閒湖上  
桂樹無香死月中  
見說錦溪墳墓好  
幾時絮酒酌西風



江月松風集卷六